

L'aisciuda é ruèda!

Chesta setemèna, a despet del temp meteorologich, te Fascia se à dejout l'Aisciuda ladina: referac, musega, publicacions e jeghes per cognoscer, pissèr e se goder con identità e lengaz



La ciantarines vidèdes dal maester Ilario Defrancesco à endeletà l'inaudazion de l'Aisciuda Ladina.

“L'é cert rejonèr de aisciuda con chest temp da freit e neif”-la l'ha dit ence la procuradora e senatora Elena Testor, a l'inaudazion de chesta XI edizion de l'Aisciuda Ladina.

Ampò se aisciuda vel dir temp e met per verdeèr, ciapèr gaissa e fèr nascer de neves fiores, l'scomenz de l'Aisciuda Ladina 2019 à dat de bona speranzas.

“L'aisciuda é ruada” l'era l titol de la ciantia che à serà sù l'inaudazion, frut del picol cors “Ciantèr ensema amò più bel” che l'Ofize linguistich del Comun general de Fascia à metù a jir de gra a la desponibilità de la Scuola de Musega “Il Pentagramma” e del maester Ilario Defrancesco.

Na ventina de ciantarines (demò un l'ardi raprejentant de la “quota bruna”) de ogni età à tout pèrt a 5 scontrèdes, les à emparà vèlch ciantia neva, les se à godù e les à ence azetà de se meter a la proa sun paladina te chesta inaudazion. Apede a dut chest, su envit del maester Ilario, les se à sproà a meter jù l test per na ciantia, e anter dutes l'é stat cernù apontin “L'aisciuda é ruada”, scritta da Chiara e metuda en musega dal maester, che à soscedà gran aprijiamet da pèrt de duc chi che se à binà te Sorastanza de la Scuola Ladina de Fascia per l'ocajon.

L Cor à ciantà ence vèlch ciantia didatica durèda te scola e doi toc del Canori: la cognosciuda Cianzon de la Vesc e La Turca, gustegol “non-sens” inedit del componist da Moena.

“No l'era tant sori laorar con n grop de ciantores tant desferenc per età e per competenza-l'ha dit l maester Defrancesco-ma aon vardà de troar fora valch che posse piajer e engaisar duc e a la fin, ence se te 5 scontrade no se pol de pensar

de meter ensema n coro struturà, se aon soraldut godù.”

L lengaz se trasmet anter generazions

Durèr e fèr passèr l lengaz a na vida naturala, anter ladins e no ladins, anter giaves, bec e genitores: chest l'é apontin l'obietif de chesta edizion de l'Aisciuda Ladina. N zil che te chesta esperienza del Cor é stat segur arjont e che caraterisea ence i etres momenc de chest event, che se sera sù en vender ai 10 da les 4 domesdi te caserma di Studafech a Pera con “L'Aisciuda de la familia”: n domesdi de jeghes da n'outa e da anchecondi.

Anchecondi, defat, l'é de gran emportanza l confront anter generazions acioche picoi, gregn e jent de età posse se didèr e emparèr un da l'auter, ence per chel che vèrda la cultura, l lengaz, la storia e la tradizions.

Chest conzet é vegnù fora più outes ti intervenc de salut e de introduzion, chel de la “patrona de cèsa”, la sorastanta de la Scuola de Fascia Mirella Florian, chel de la procuradora e senatora Elena Testor e chel de la responsabola di Servijes linguistics del Comun General Sabrina Rasom.

“Noi aon envià via jai egn l projet “Na comunanza che empera”-à dit la Sorastanta-apontin percheche aon vedù che, se da na man la jent de età pel didar i bec a cognoscer parole e usanze da n'outa, da l'autra i bec che studia l ladin a scola anchecondi de spes i porta le parole ladine a ciasa, olache magari i genitores vegn da fora o no i reiona ladin.”

“La familia l'é l lech olache se bina e se confronta esperienzes desferentes-à jontà ite la Procuradora-e per chest con la

Consulta ladina aon volù ge dedichèr chesta edizion de l'Aisciuda, portan dant momenc sorii e gustegoi da viver ensema.”

Se l'autoritàdes doventa «peer leaders»

Per l'inaudazion de chesta Aisciuda Ladina, l staff de l'Ofize linguistich se à pissà donca vèlch da desferent respet a la solita lingia de intervenc. Dò aer vardà n belot video di bec de la edizions passèdes con Bertol, duc à podù veder e scutèr na intervista a Tullio de Mauro, n linguist stat ence Minister a l'Istruzion che l'ha semper sostegnù duc i lengac. Dapò la autoritàdes te sala é states envièdes a fèr da “peer leaders”: a vigniuna ge é stat dat sù n grop del publich, e dò aer rejonà con sie grop de la situazion linguistica te Fascia, i à cognù portèr dant l'ejit del confront.

Cosci la Procuradora, la Sorastanta, l Conseier provinzièl Luca Guglielmi, l Maggiore di Carabinieri Enzo Molinari, l diretor de l'APT Andrea Weiss, la conseiera de Procura e neva presidenta de l'Istitut Ladin Lara Battisti e sie antecessor Antone Pollam, l president de l'Union di Ladins Fernando Brunel, l'ombolt de Soraga Devi Brunel, l conseier de Procura Matteo Iori e l conseier provinzièl Gianluca Cavada, i à portà dant pensieres, imprescions e osservazions del publich. A la conscidrazion che da man de la istituzions e de la scola vegn fat trop per tegnir sù l ladin e che l bilinguism é de valuta ence per ge orir la strèda ai etres lengac, se à jontà la consaputa de l'emportanza che l vegne portà inant e rejonà ence te cèsa, soraldut dai ladins, e che i no ladins vegne engaisé a se sproèr, ge portan dant ejempies de bon lengaz, ma zenza i sperder jù con regoles massa rigorouses.

Chel che i ladins à arjont l'é emportant-l'é stat dit-ma cognon emparèr a ge voler più ben a nosc lengaz, a tegnir empeà l fech de l'identità te familia e a lurèr duc più adum.

E en cont de lurèr adum, ence chest an l'Aisciuda Ladina à volù tor ite vèlch sociazion de val: la sera de inaudazion se à serà sù con na bona “apericena” enjignèda da la Coprativa Oltre con sie laboratorie “Cojinèr ensema” e la bonamans de duc i momenc de chesta edizion vegnarà sporc a la sociazion Bambi.

Lucia Gross